

Caribbean Calypso Festival lo bira e reemplazante di ABC Tumba Festival

ORANJESTAD (AAN): Segun DIARIO a compronde, directiva di ASOMA pronto lo reuni pa concretisa e futuro "Caribbean Calypso Festival" cu lo bay reemplaza ABC Tumba Festival.

Un biaha mas, ASOMA ta enfatiza cu ABC Festival no ta existi mas.

"E Festival di Calypso aki cu lo NO bira un competencia, sigur lo bira grandi como cu e aprecio y costumber di añanan cu e ritmo aki, ta grandi y hopi aprecia na Aruba," ASOMA a declara.

"E negativismo di ABC Festival ocasiona pa un isla, pa nos di ASOMA ta pertenece na

pasado. E lagrimanan drama di nos musico-, cantante-, y dirigentenan di ASOMA cu no a haya justicia, hamas lo ser lubida," ASOMA a declara na DIARIO.

Aruba lo sigui toca su tumba na su manera pa su pueblo, sin mester di envidia di ningunotro isla. ASOMA tabata orguyoso tambe cu nan a haya CSS pa transmiti e evento aki pa henter Norte-, Centro-, y parti di SurAmerica. "Un tremendo propaganda pa Aruba".

Joy Kock di ASOMA a declara cu mescos cu nan condicionnan tabata cu ABC Festival, nan lo haci tur lo posible pa e Caribbean Calypso Festival worde transmiti tambe.

"E festival di Calypso aki lo mester bira un tradicion anual cu tur islanan cu ta toca Calypso den Caribe lo bin Aruba cu nan ganadornan di nan contestnan.

E festival aki lo no bira un contest, pero un intercambio cultural. E pensamiento ta pa trece e Rey di tur Reynan cu ta "Sparrow" di Trinidad como "gueststar" y tambe e anochi grandi aki lo bay ser dedica na su persona.

ASOMA ta mostra cu e festival aki ta pa pueblo y consecuentemente tremendo pa turismo.